

Y toch ta sigui kere cu orcan nunca lo dal Aruba

Mi tin miedo di un orcan.

Mi a yega di pasa den dos orcan chiquito di forza 1 y esey mes mi ta haya di mas pa nos isla caba. Mayoria di nos riba e isla aki no sa kico ta un orcan.

Nos no pasa den un orcan y ta tumando tur cos cu **"lague bin numal!"**

September a habri. Nos no sa kico **TEMPO** lo duna nos e luna aki of luna di october.

E **"expertonan"** riba nos isla lo bisa sigur cu mi ta skirbi muchachada aki y cu mi ta mucho fatalistico y negativo. Ta asina bo mester ta si bo kier adverti hende riba e isla aki.

Si un orcan pasa riba nos isla, mi ta mira decenas di cas destrui. Sea dak no a wanta, of muraya no a wanta, y cu tur aspecto negativo cu esaki ta trece cune.

Mayoria di e hendenan aki tampoco lo tin asegurado, y si nan tin asegurado mes, ta tur sorto di excusa lo ser duna pa no cubri. Djis mira kico a pasa na New Orleans mes, caminda a busca tur sorto di pretexto pa no cubri.

Ademas di e casnan aki, ta cuanto negoshi lo no keda cu dañonan grandi? Cuanto hende ta keda sin trabao pasobra doño lo no por cubri salario durante e periodo cu tin tur e dañonan aki.

Naturalmente lo bisa cu nan mester ta segura pa cubri esaki, pero ta cuanto ta asegura pa cubri e gastonan despues di orcan y cu salarionan inclui?

KICO SI NO TIN AWA NI CORIENTE

Ta hopi familia e ora ey lo ta sin entrada.

Otro negoshinan cu si a keda riba pia lo haya e problema di venta, pasobra nos no por cumpra normal mas tampoco, mirando e daño grandi cu tin y nan tambe lo no wanta e peso financiero pa hopi tempo.

E posibilidad lo ta cu hopi tuberia di awa lo por kibra y cu lo tin problema di distribucion di awa via e tuberianan aki. Tres dia di awa den botter, den container, den hemchi, etc., no ta wanta si mester warda dianan largo pa awa.

Si nos red di electricidad haya daño grandi, ta hopi dia, pa no papia di siman, lo mester keda tambe sin coriente prome cu lo por ta normal atrobe.

Un orcan cu awacero y biento pisa, lo destrui tambe cantidad di caminda, caya, y carretera riba nos isla, di manera cu transportacion tambe lo bira masha dificil y cu casi no por move di un barrio pa otro of di un distrito pa otro.

E cantidad di matanan y sushedad cu lo tin riba e caya, caminda y carretera aki, tambe lo bira un estorbo grandi, especialmente si Serlimar no por move riba su capacidad normal y empresanan cu equiponan pisa tambe no por funcio. na normal. Ta ser conseha pa percura pa bo tin bo tanki di auto yena. Awendia un tanki normal di gasoline ta 100 florin. Ta kende ta bisa cu nos lo tin e 100 florin ey pa yena nos tanki, y cuanto hende lo logra esaki prome cu orcan yega, mirando e rijnan grandi cu pa cos mas chiquito tin caba?

Y despues di e destruccion cu mi ta menciona aki, ki facil lo ta pa logra gasoline despues di orcan y cuanto hende lo tin placa pa esaki?

Sigur ta si cu hopi auto lo no ta riba caya, no pa falta di gasoline, pero pa falta di destruccion of daño cu nan lo sufri ademas.

Esaki lo causa tambe cu hopi hende lo no yega nan trabao, si ainda nan tin trabao y mirando e direccion cu Aruba a bay aden ultimo añanan, esaki lo ta motibo tambe pa dunador di trabao bisa nan cu nan ta retira, pa asina laba man..

Si e situacion bira hopi malo, ta cuanto ambulance lo tin pa transporta hende pa hospital, y con nan lo haci esaki cu camindanan kibra. Con brandweer lo move na momento di candelanan durante orcan of despues di orcan?

TRATAMENTO "DRIVE THRU"

Na hospital lo tin suficiente hende pa atende e cantidad di patientnan cu lo mester atende, afecta pa e orcan?

Nan lo por haya tratamento normal, of tratamiento di **"drive thru"**? Tin manera pa atende e cantidad di nos grandinan cu kizas lo mester

di tratamento, y nos babynan y yiunan chiquito cu tambe lo mester di tratamento?

Tin manera pa tur esnan cu mester di cierto remedinan haya e remedinan aki?

Gobierno tin manera pa yuda decenas di familia cu reconstruccion di nan cas, na lugar di haya politiconan ta cana rond ta braza hende y expresa: **"nos lo yuda!"** y nada lo sali afo? No tin placa pa yuda y si tin placa mes ta bin tende tur sorto di ponencia y excusa pa no yuda y kendenan si lo yuda.

Hopi familia lo cay den un desaster financiero, y Ontvanger, FCCA y banconan tambe aseguranon no tin curazon ni sentimento pa esaki, pasobra ta cu number nan ta traha y no cu hende.

Gobernantenan y politiconan lo mustra e otro cara, y no esun bunita di periodo di campaña, pues aki tampoco lo no tin yudanza cu por spera. Si situacion bira alarmante riba nos isla, tin suficiente cuminda pa wanta un pa dos luna pa tur hende por alimenta nan mes tur dia? E logistica aki ta prepara for di awor caba?

E situacion di awa y lodo, y desperdicio cu lo tin riba nos isla, lo pone cu riba tereno di sanidad, nos lo por pasa den dianan y simannan di peliger pa nos salud, nos ta prepara pa e situacion aki? Mester corda bon cu no ta tur school ta den condicion tampoco pa wanta un orcan, y esey lo por haci cu lo no tin school tampoco, y ta hopi mucha lo ta na cas cu peliger di termina

buscando ayudo medico, debi na metal skerpi, glas, splinternan y clabo cu lo por ser haya tur caminda y cu nan por trapa riba. Nos tin suficiente especialista pa atende e cantidad grandi di hende cu lo cay den depresion despues di pasada di orcan, mirando den kico nan a haya nan mes mentalmente?

PLACA PLACA PLACA

E asunto di shelternan tambe ta keda un problema.

Tempo di orcan Ivan, nos a wordo gafia cu tin cierto cantidad di shelter, pero nunca a menciona unda nan ta, y despues a resulta cu no tabata tin ni un shelter. Awor ta tende cu no tin shelter tampoco. Nos a conoce awacero torencial, nos a conoce pasada **"leu"** di rabo di orcan, pero e orcan mes, mayoria di nos riba e isla aki no conoce y nunca a pasa aden.

Si nos ta prepara?

September a dreña y mayoria di habitante no tin 300 florin pa 1000 florin pa haci preparacionnan **AWE**.

No tin placa pa cumpra plywood, ni triplex, ni zink, ni radio di bateria, ni bateria, ni jug, ni hemchi, ni tape pa bentana y portanan di glas, ni stock cuminda di bleki, ni cumpra plastic pa tapa aparatonan, ni placa pa cumpra bela y kerosin pa "lampi di orcan", nada pa cubri portanan y bentanan, cabuya of cadena pa mara botternan di cas, barinan di sushi etc.

Si algo pasa cu e botternan di gas, y nos keda sin coriente, no por cushina tampoco, si no tin palo pa traha candela pafo y cushina riba piedra.

No por flush WCnan tampoco y riolnan lo ta geplug tur caminda y ta malesa so por spera.

Mayoria di cas na Aruba tampoco tin aparato pa paga candela of hemchi pa yena cu santo pa si encaso un candela presenta.

Si dak di cas bay, si muraya mester basha abao, mayoria di hende no tin caminda di bay, y mayoria di familia no por tuma otro familiaran cerca nan, si nan mes ta pasando den problemanan grandi **"post orcan"**.

No ta tur cas tin e asina yama **"shelterbox"**, e lugar mas sigur pa sconde den cas, principalmente familiaran cu 5 of mas hende no lo tin e lugar aki den cas pasobra baño mes ta mucho chiquito pa tur. Nos mester corda tambe cu lo no tin comunicacion telefonico, ni di celular si nos red di electricidad wordo afecta y tambe e red of antennenan di comunicacion di celulan, y incomunica mayoria di hende lo keda.

Yamami loco, bisa cu mi ta fantasia mucho, bisa cu mi ta mucho negativo. Ta bon! Mi ta acepta esey, y tambe ta reza pa orcan no pasa azota e isla aki, pasobra mi no kier pasa den nada cu a ser describi aki riba.

Juby Naar